

Izjava OHR-a na konferenciji za medije međunarodnih organizacija

OHR konstatira da institucije BiH postaju ozbiljnije u pogledu ispunjenja rokova za provođenje ključnih reformi koje se odnose na 16 uslova koje je postavila Evropska komisija za otpočinjanje pregovora o zaključivanju Sporazuma o pridruživanju i stabilnosti.

Ove sedmice je Dom naroda Parlamenta BiH, na zahtjev Vijeća ministara BiH, odlučio da razmatra zakon o agenciji SIPA, zakon o Visokom sudskom i tužilačkom vijeću i Zakon o visokom obrazovanju po skraćenom postupku.

Ukoliko ove aktivnosti označavaju ponovno usredsređivanje na reforme onda ih pozdravljamo.

Istovremeno, postoje područja u kojima politički lideri u BiH očigledno ne čine pomake, i to mjesecima. Na primjer, imenovanje direktora Agencije za statistiku BiH. Imenovanje odgovarajućeg kandidata očekuje se još od decembra prošle godine.

Ne radi se o tome da nema odgovarajućih kvalificiranih kandidata; ovo je rijetko problem u BiH. U decembru prošle godine, Agencija za državnu službu BiH, u skladu sa važećim domaćim zakonima, utvrdila je kvalificirane kandidate koji ispunjavaju profesionalne kriterije za ovu poziciju.

Uprkos tome, do imenovanja nije došlo, iako je funkcionalna Agencija za statistiku jedan od uslova za pregovore sa Evropskom komisijom o Sporazumu o pridruživanju i stabilizaciji, i uprkos činjenici da će takva agencija igrati ključnu ulogu u privlačenju investicija i omogućit će Vladi BiH da precizno planira buduće aktivnosti koje se zasnivaju na

stvarnim potrebama BiH.

Vladajuća koalicija u BiH se mnogo puta obavezala na provođenje reformi. Sada treba da objasne biračima zašto do ovog imenovanja nije došlo u četiri mjeseca, iako su u okviru zakonske procedure utvrđeni odgovarajući kvalificirani kandidati, te zašto još uvijek nema formalnog datuma kada će se izvršiti rasprava o ovom imenovanju.